

I fascegn tol sù la gran endesfida

L Comun General de Fascia, ciareà de poder e responsabilità, pea via recordan la storica radunanza di Ladins del Sela del 1946

Politica - L Comun General de Fascia à tacà a mever si prumes vèrsc ofizial. Chisc dis passé l'é stat chiamà ite na scontrèda outa ai neves amistradores de Fascia, voluda dal President del Comprenjorie Ladin Leonardo Bernard adum con la neva Procuradora Cristina Donei, con l'obietif de spieghèr coche l'é nasciù la neva istituzion. A la scontrèda à tout pèrt l'assessor ai Enc Locai Mauro Gilmozzi, la dotora Patrizia Gentile, funzionaria de la Provincia autonoma de Trent e l'conseier ladin Luigi Chiocchetti.

La pruma radunanza del Consei General sarà bonamenter ai 14 de messel, na data storica - à deschiari Cristina Donei - che vel recordèr la radunanza di Ladins del Sela apontin di 14 de messel del 1946, de gran segnificat donca per l'percors che ades à dedant noscia comunità. Sarà n gran besegn de jent con abilitèdes, competenzes, pragmatism e disponibilità - à dit la neva Procuradora - per arjonjer i doi obietives de percacenza e efizienza che se meton dant. Ma no podarà mai mènçer l' respet per la istituzions e la persones, la condivizion di

valores etics, la coerenza, la gaissa e l' trasport per ge jir dō a l'obietif de arjonjer l'unità de val.

La parola "responsabilità" è ressutèda da più man endèna la scontrèda, responsabilità envers l' passà e envers l' davegnir - à dit Luigi Chiocchetti - per passèr sorafora ogni campanilism; consaputa che maor poder vel dir ence maor responsabilità - à uzà fora l'assessor Gilmozzi - responsabilità de ruol che duc arà tel nef organism - à auspicà apontin Cristina Donei.

Te l'averjer la scontrèda l' president del Comprenjorie Bernard, che l' volù ge sporjer n salut a duc dant de sturter sù sia encèria publica, l' à deschiari che la gran desferenza che caraterisea l' Comun General da la oramai veia istituzion l' è met de portèr inant azions amministratives nia più per delega, donca te l' inom de la Provincia, ma per competenzes, donca da protagonist, con la piena autonomia e coi strumenc aldò, delalte da n chèder de referiment stabèl se sà ben da la Provincia. Ve speta a voi amistradores ades, empienir de contegnui chesta scatola veta - l' è stat l' envit de

Bernard - acioche duta la forzes en ciamp mete a jir na colaborazion percacenta e concreta.

L' è una de la più gran endesfides per Fascia per tor so davegnir te anter la mans - à dit l'assessor Mauro Gilmozzi - che dèsc l' met de portèr danef na lingia de temes sul teritorie. Amò apede l' à arsegurà duc chi che è cruziè che l' Comun General posse menèr a descancelèr picola realtèdes de comun: no se serarà nia - l' à sottrissà - ma vegnarà portà inant n fon lurier de valorisazion de chel che l' è, col miorament di standards de duc i comuns, la otimisazion de la ressors e, se l' è meso, l' smendrament de la speises.

L' aspet burocratic-formal l' è stat uzà fora delvers da la dotora Patrizia Gentile, l' funzionèr de la Provincia responsàbol del Projet spezièl per la reforma istituzionèla. La dotora Gentile, col didament de na prejentazion en power point, l' à rejonà de vèrsc, doeres e encèries del nef organism, deschiarian desferenzes, particolaritèdes e potenzialitèdes.

Cristina Marchetti



La funzionaria provinziale Gentile, l'assessor Gilmozzi, e l'conseier Chiocchetti è intervegnui a la scontrèda coi amistradores de Fascia, voluda dal president del Comprenjorie Leonardo Bernard, che resta en cèria fin a l'ensediament ofizièl del nef Comun General, e da la neva procuradora Cristina Donei.

L Comun General de Fascia

La lege provinziale n. 3 di 16 de juyn del 2006, cognosciuda desche lege de reforma istituzionèla, la ge dèsc n nef endrez al sistem de la istituzions trentines, Provincia, Comuns e Comprenjories, tel respet di prinzipies de sussidiarietà, adatement e desferenziazion, con l'obietif de portèr la azions amministratives più vejines al sentadin. L' è tel chèder de chesta lege, che ge dèsc valor a la autonomies locales, che vegn disciplinà la formes per l'ejercizie de la funziuns amministratives da man de sociazions de comuns ti ambic teritorièl, la comunitàdes

de val. Su nosc teritorie, olache vif popolazions de lengaz ladin, vegn metù a jir l' Comun General, che dal pont de veduda giuridich l' è ent public strutturà apontin desche sociazion de comuns.

L' Comun General gestesc la funziuns amministratives che ge à passà la Provincia e l' pel tor sù ence competenzes che volarà ge passèr i Comuns. La gran neva l' è che i trasferimenc de poder vegnarà gestii a na vida autonoma e nia più desche brac operatif de la Pat.

Orghegn de chesta neva istituzion l' è l' Procurador, che corespon al President de la Comunitàdes de val, l' Consei

general, che fossa la radunanza e l' Consei di ombolc, la Jonta politica.

Dal 2015 sarà ence l' Consei de procura, l'orghen esecutif: la funziuns de chest ultim per i cinch egn che vegn ge pervegnarà al Consei di ombolc.

La pruma radunanza, fissèda per i 14 de messel, la sarà n muie formala, desche l'insediament de n consei de comun. L' Comprenjorie vegnarà tout jù dō l' decret de trasferiment de la funziuns del president de la Provincia e l' adozion di acfondamentèi da man del Comun General. (cri.m)

Bon ejit per i ejames de ladin

Passa l' 70% di candidac à otegnù la valutazion de 7/10 che dèsc l' met de passèr la proa

Se à serà sù ence chest an i ejames per l' zertament de la cognoscenza del lengaz ladin de prum e secont livel pervedui dai decrec legislatives 592/93 e 321/97, per poder aer la prezedenza ti posc de lurier public de Fascia.

La pruma pèrt de l'ejam, la proa scrita per l' secont livel (che ades l' pervet ence na proa a ousc), era stata metuda a jir ai 19 de oril, e di 45 candidac che se aea enscnuà i se à prejentà de 39. De chisc ben 27, béleche l' 70%, i à otegnù la valutazion de amàncol 7/10, che ge à dat l' met de sostegnir ence la seconda proa, a ousc, che dapò duc e 27 i à passà.

Chisc i candidac che à otegnù l' patentin de secont livel: Adriano Bernard, Christian Bernard, Walter Bernard, Martina Cianciulli, Chiara Dantone, Nicola Decrestina, Stefano Defrancesco, Alessio Degiampietro, Doris Fosco, Pierangelo Giacomuzzi, Simonetta Iori, Daniela Pederiva, Sebastian Pederiva, Valentina Rasom, Valentina Redolfi, Arianna Riz, Giulia Riz, Martina Riz, Giulio Rizzi, Romina Somavilla, Letizia Soldà, Stefania Tivelli, Rosanna Verra, Bernardino Zulian, Daniela Zulian, Simone Zulian, Valentina

Zulian.

L' è da dir che chest an, per la pruma outa, l' è stat scrit ite a sostegnir l'ejam, diretamente da la Scola, ence i studenc che à fat l' percors de ladin tel Liceo de Fascia. Na neva oportunità che jirà inant ence ti egn che vegn, magari ence con na sescion de ejames "ad hoc" per i studenc.

Ai 18 de mé enzeve l' è stat la proa de ejam per l' prum livel, chel demò a ousc, che dèsc la prezedenza per i posc publics te la carieres ausilières. Sun 17 candidac scric ite 2 no se à prejentà e demò 4 no i à arjont la valutazion de 7/10, donca l' 73% à abù ejit positif.

Chisc i candidac che à otegnù l' patentin de prum livel: Orietta Brunel, Elisa Cincelli, Fausto Dantone, Michele Degasper, Braian Grasser, Eugenia Pezzei, Diego Francesco Riz, Giancarlo Somavilla, Maria Sottsass, Elisabetta Vian, Marilia Daniela Zorzi.

L' è da dir che ti dis subito dō l' è stat endrezà ence i ejames de ladin de la Scola, che dèsc la prezedenza per chi che vel ensegnèr te Fascia, ampò chisc resultat i cogn vegnir touc dant e aprocà a Trent, e donca no i è amò desponiboi.

Parèda maladeta

Massimo Girardi de Transdolomites auza fora la costion de la segurezza su la strèdes, en particulèr i pericoi de la proteziuns de metèl

L'azident con la moto sozedù enstadì sa Valongia à soscedà gran imprescion. Estra la solidarietà a la vitima de chel che l' è sozedù, me prem oujer l'atenzion a la consequences abudes da l'impac con la parèda de metal che per tòc lonc, en particulèr te la utèdes, la serf desche protezion enlongia strèda.

Rejonèr de mobilità vel dir ence rejonèr de segurezza su la strèdes, donca ence de la òperes de prevenzion pissèdes per chest fin. La tuscèdes violentes con chesta sort de parèdes, estra l' cajo sozedù sa Valongia, les pel se verifichèr per via del giarel su la strèda, de la velocitè massa auta, de la pecia esperienza, de la inclinazion de la utèdes che de spes les "trèsc en fora" e amò de auter.

Ma no l' è assà: tropa outes chi che va con la moto dō esser sutè jabas i rua permez la strèda e la parèda de metèl e chest pel provochèr la amputazion de na giana o aer consequences amò piores. Per limitèr o adertura schivèr chisc evenc dramatics da vèlch an la Provincia autonoma de Busan à enjontà sotite la parèdes na fascia de metèl a ones, con chela de schivèr l' risech che chi che va con la moto ma ence con la roda posse ruèr a se ficèr sot ite.

Chest intervent è stat metù a jir ence forin Mont da la man de

Busan, sturtà sù endèna l'aisciuda passèda. Da la man de Trent enzeve no l' è stat tout sù chist provèdiment, ma chest vèl ence per altra strèdes.

L' pensier che nasc l' è chist: tropes, residenc o no, va su la strèdes dolomitiches, desche sun tropa altra strèdes, con la moto o con la rode. La logica e l' ferstont cognessa menèr a pissèr che i provèdiment per miorèr la segurezza de la circolazion stradèla i cognessa vegnir apliché dut entorn sul teritorie e no se fermèr sui confins amministratives de provinzies, regions o Stac.

Canche se se fèsc n pensier sun dut chist, se rua a la concluzion spropositèda che la probabilitè che sozede n azident è più leèda a na costion de teritorie o de nazionalità che al destin o risech che aon en comun duc nos omegn mortèi.

Massimo Girardi, president de Transdolomites



L logo de Transdolomites.